

## 每週經課朗誦經文 ( 巴克禮台語漢字 ) 2011/12/04

### 共同經課-1 以賽亞書第四十章一節~十一節

1 恁的上帝講：恁著安慰，安慰我的百姓。 2 著對耶路撒冷講好話，閣報伊知，伊的交戰已經盡；伊的罪過已經赦；伊為著伊一切的罪，對耶和華的手加倍受刑罰。 3 有聲叫講：佇曠野備辦耶和華的路，佇沙漠的地，修平咱的上帝的大路。 4 諸個山谷攏欲填互伊淀，大細的山頭攏欲掘互伊低；彎越的欲改互伊直，崕碯的欲修互伊平。 5 耶和華的榮光的確顯現；凡若有血氣者欲攏看見；因為這是耶和華親嘴講的。 6 有聲講：你著叫！伊講：我著叫甚麼？見若有血氣者攏親像草；伊的榮光攏親像山裡的花。 7 草會乾，花會謝，因為耶和華的氣吹佇伊的頂面；百姓真正是草。 8 草會乾，花會謝，獨獨咱的上帝的話的確永遠佇喲。 9 報好消息互錫安的啊，你著上高山；報好消息互耶路撒冷者啊，你著盡力出你的聲。著出聲毋免驚，對猶大的城講：看啊，恁的上帝！ 10 看啊，主耶和華欲親像大權能者臨到；伊的手的確為伊掌權。看啊，伊的賞賜佇伊遐；伊的報答亦佇伊的面前。 11 伊欲親像牧者顧伊的羊群，伊欲用手伏倚羊仔子，抱伊佇胸前，慢慢導許個互羊仔吸奶者。

### 共同經課-2 詩篇八十五篇一節~二節，八節~十三節

1 [可拉的後裔的詩，交互樂官。] 耶和華啊，你已經施恩佇你的地，雅各受掠的人你救伊倒來。 2 你赦免你的百姓的罪惡，你遮蓋in一切的罪過。(細拉) 8 我願聽全能的耶和華所欲講的；因為伊欲對伊的百姓，及伊聖的百姓講平安；總是in毋通閣去濫糝行。 9 伊的救恩實在近佇驚畏伊的人，互榮光踎佇咱的境內。 10 慈愛及真實相抵著；公義及平安相咬嘴。 11 真實對地裡發生；公義對天看落來。 12 耶和華欲賞賜好物；咱的土地欲出伊的土產。 13 公義欲行佇伊的頭前，互伊的腳跡成做路。

### 共同經課-3 彼得後書三章八節~十五節

8 所疼的兄弟啊，有一項恁毋通袂記得，就是主看一日親像一千年，一千年親像一日。 9 主無延延佇所應允，親像人有的看做延延的，就是寬容恁，毋愛有人沈淪，是愛人攏反悔。 10 若是主的日欲到親像賊。彼日，許個天欲有大聲廢去，許個原質受燒來消滅，地及其中所有的物也燒燬去。 11 萬物既然欲按呢消滅，就恁佇聖及敬虔，著做甚麼號的人， 12 來向望續催迫上帝的日到。為著按呢，諸個天會互火消滅，原質受燒就鎔去。 13 若是照伊所應允，咱向望新的天新的地，義悒佇in中間。 14 所以，所疼的兄弟啊，恁既然向望諸個，著殷勤互恁無拉摻，無瑕疵，安然見著伊； 15 閣著看咱的主的寬容做拯救的因由，親像阮所疼的兄弟保羅，照所賞賜伊的智慧也曾寫批互恁。

### 共同經課-4 馬可福音一章一節~八節

1 上帝的子，耶穌基督福音的起頭。 2 親像佇先知以賽亞的冊所記載講：我差我的使者佇你的面前，來修整你的路。 3 有啲叫佇曠野的伊的聲講：著備辦主的路，修直伊的小路， 4 約翰來，佇曠野行洗禮，傳反悔的洗禮，互人得著赦罪。 5 通猶太地及耶路撒冷的眾人攏出來就近伊，認in的罪，佇約但河對伊受洗禮。 6 此個約翰穿駱駝毛，腰結皮帶，食草蜃及山野的蜜。 7 伊傳講：「有一個比我卡有權能的，隨尾我來，就屈落來解伊的鞋帶我也袂堪得。 8 我曾用水給恁行洗禮，伊欲用聖神給恁洗。」